

Буре ваён

Кылбурлэн кужымез бадзым

Бызым Вормонлэн 77 ар тырмонэзлы сйзыса, Йоскалык прессалэн юртэз Национальной библиотекаын ортчытйз «Нокин уз вуны...» флешмоб. Ивор вёлмытйсьёс, писательёс, библиотекаын ужасьёс тазы буре вайизы Бызым оже ветлэм удмурт гожьясьёсмес.

Удмурт писательёсты, журналистёсты тодэ ваён ужрадэз усгыса, Национальной библиотекаысь шаертодонъя но фин-угор литературая ёзэн кивалтйсь Татьяна Николаева шуиз:

— Шумпотйсько, вунэтыны кутскем книгаосты поттыны, лыдзныны, авторёсты тодамы вайыны муг сюре ке. Али война сярсы тодэ ваёнёсын бичетьёсты выставкаосы поттйськом, соосты выльысен киямы кутйськом.

Йоскалык прессалэн юртэныз кивалтйсь Зинаида Рябинина чектйз писательёслэн-фронтовикёслэн туспуктэмёсынызы «Бессмертний полке» потыны. Малы ке шуоно тросэз соос вунэтэмын, кинлэн ке пинальёсыз ик ой вал, табере бырем фронтовикёслэн шайгуосы но анализэмын ни:

— Көня ке ар талэсь азыло утчаськымы но шедьтймы оже ветлэм 73 журналистёсты, кудъёсыз ужазы «Советской Удмуртия» газетын но ёрос изданиосын. Но соос эшшо вань на, дыр. Умой луысал, удмурт писательёсты, кин гожьяз война, вормон сярсы, огъя базае пыртыса. Соос сярсы ивортонэз, произведениоссэ



Тодосчи Александр Шкляев вераз фронтэ ветлэм писательёс сярсы.

Туспуктйз Людмила ЧЕРНОВА

жогак но капчияк шедьтыны мед луоз. Война вакытысь писательёслэсь чуръёссэс лыдзйськод ке, валаськод: удмурт гожьяськисьёс пычалэн но, пероен но ожмаськызы. Кыл — со сыче ик ож тйрлык. Кылбурлэн туж бадзым кужымез.

Совето Союзысь 10 сюрс журналистёс кошкызы фронтэ. Кылсярысь, удмурт писатель но публицист Игнатий Гаврилов фронтын дивизионной газетын ужаз. Наступлениос дыръя передовойын вал, гожьяз солдатъёс но командиръёс сярсы. Та публикациосыз эскеремын өвёл на, соосты шедьтыны луоз, дыр, Обороная министерстволэн архивысьтыз гинэ.

Котькуд ожмаськем писатель сярсы трос тунсыкозэ вераны луэ, шуэ Удмуртиысь

калык писатель, критик Александр Шкляев. Со тодаз вайиз оже пыриськем куд-ог удмурт гожьяськисьёсты. Кылсярысь, Аркадий Клабуковлэн туж чебер почеркез вылэм, котькуд букваез суредам кадь. Со лыуса ик удмурт писатель штабе сюрем. Отчы ке ой кутысалзы, со та войнаын бырысал, дыр. Нош Степан Ширококов фронтын машинаен снарядъёс нуллэм.

— Ашалычи Оки 1941-тй арын 22-тй июне вазь чукна, шунды жужамлэсь азыло ай, кылйз йбем куарез, нош нуназе бере калыкы ивортйзы ни, война кутскиз шуыса. Нош кыкетй нуналаз сое басьтйзы фронтэ. Тимофей Шмаков войнаын артиллерист вал, вуиз Кёнигсберг-озь. Лопата, пычал, штык сярсы гожьяз, фронтовой

тйрлык сярсы кылбуръёсыз тунсыкоесь. Пётр Блиновез фронтэ уг басьто вал, малы ке шуоно со номенклатурной ужась лыдыськиз. Военкоматэ 1 пол, 2 пол ветлэмез бере ини П. Блинов шуэм: «Мынам романэ вань, отын герое — лётчик. Со али фронтын, мон но отын луыны кулэ, сотэк кызы романме гожтом». Но П. Блиновлы ожысь бертыны но роман гожтыны өз кылды ни. Николай Байтеряков кылбурчи мугорын пичи вал бере, войнаын танкистэ шедиз. Но со эшшо знамя нуллэм. Тодаз вайылыз, кызы, знамяен мыныкуз, сое төл палэнэ нуэ, пе, вал, — шуэ Александр Григорьевич.

Пумиськонэ лыктэмъёс юром дышетэм, чаклам кылъёсын өз вераське. Котькудйз вераз сое, мае ачиз

тодэ, мар солэсь сюлэмзэ бугыртэ, котькудйз ачиз ик бырйиз авторез, кылбурез. Кылсярысь, Галина Романова тодаз вайиз Игнатий Гавриловлэн дневникъёсыныз ужамзэ. Туж чебер, валамон почеркен гожьям дневникъёс, пе, вал. Войнаын дневник нуныны уг лэзэ вылэм, но И. Гаврилов удмурт кылын соосты гожьям, оло, газетын ужамез юрттэм солы та тодэ ваёнъёссэ утыны. Но туннэ нуналлы, жальяса верано, та рукописьёс ышемын. Галина Романова ужрадын аслэсьтыз «Солдат бертэ» балладазэ лыдзйз.

«Зечбур!» газетлэн редакторез Антонида Ермолина тодаз вайиз фронтовик писательёсын — Григорий Симаконен, Евгений Самсоновен, Илья Зоринэн — пумиськылымъёссэс-вераськемъёссэс.

— Фронтовикъёслэсь улон сюрессэс чакласькод ке, со быдза сюлэмо адямиос вал соос. Тани Евгений Самсоновен но мыным эшгьяськыны кылдйз. Войнаын сое, кулэм кожаса, морге куштйллям ни вылэм. Комакъёс сиыны кутскиллям но, со шөдэм, куаразэ сётэм, озы улэп кылем, — шуэ А. Ермолина.

Флешмобын чузьяськызы Ф. Кедровлэн, И. Зоринлэн, Н. Байтеряковлэн, Ф. Васильевлэн, Г. Сабитовлэн но мукет писательёслэн кылбуръёсы. Люкаськемъёс озы ик чош быдэстйзы Н. Байтеряковлэн кылъёсызъя Н. Шкляевлэсь гожтэм «Топольёс» кырзанзэ.

Галина СЕМЁНОВА

«Огья Россия»

Тазалыкез эскерем понна — кузьым



«Огья Россия» партилэн Удмуртиысь ёзэзлэн пресс-службаез

«Тазалыклэн ульчаяз» ог 200 адями эмьясьёслы возьматскиз.

«Огья Россия» партилэн общественной поддержка штабаз Вормон Нуналэз юртэт сётыса пумитазы. Вазь чукнаысен татысь волонтеръёс, калыкы капчи мылкыд сётыса, Георгиевской лентаос люкылйзы, нош ветеранъёслы — сяськаос.

Со сяна, штаблэн площадказ «Суредаськом Вормонэз» акция радъяськиз, нылпиос но анай-атайёс асфальт вылын суредаськызы. Бёрысь ужаны кутскиз «Тазалыклэн ульчаяз». Калык нокыче черодъестэк быгатйз тазалыкэз эскерыны,

дерматологлэсь, стоматологлэсь, инфекционистлэсь, терапевтлэсь, кардиологлэсь но психологлэсь визькенеш басьтыны, вирзэ ВИЧ-инфекцилы эскерыны. Тросэз тазалыкенызы герзаськем анкетируванийез ортчизы. Эмчиос дорысь потэмъёсты пичи кузьымъёс возьмазы — питомникысь ваем узылэн, бутниклэн (мяталэн) удъёсы.

«Огья Россилэн» праздникёс дыръя ортчылйсь акциез сяме пычаз ни. Озы адямиос шулдырьяськыны но, специалистлэсь консультация басьтыны но быгато.

Нырысетй элькун больницалэн валтйсь врачез

Александр Шаклеин пусйиз: Вормон Нуналэ «Тазалыклэн ульчаяз» эскериськиз 200 пала адями.

Партилэн штабелэн площадказ «Формирование комфортной городской среды» проектъя куара сётыны луэ на вал. Эшшо **pg.er.ru** сайты пусйиськыны «Огья Россилэн» праймеризаз пыриськон понна. Предварительной голосование луоз 23-тй-29-тй мае. Соя бырьемын луоз, кыче кандидатъёссэ партия Кун Кенеше бырьёнъёсы поттоз.

Елена ВАСИЛЬЕВА